



Fāifai pea Hoko ko ha
**Fāmili
Ta'engata**

Fai 'e Jane McBride
Makatu'unga 'i ha talanoa mo'oni

"Ilonga 'a e me'a te ke fakama'u 'i māmaní, 'e fakama'u ia 'i he langí" (Hilamani 10: 7).

“Oku 'uhinga ki he hā 'a e 'Ko e Ngaahi Fāmili 'Oku Ta'engatá?” Ko e 'eke ange ia 'e Miá. Na'á ne 'unuaki'i leva 'ene fo'i paté 'i he papa va'ingá. Na'á ne fakahoko mo hono kaungāme'a lelei ko Souí, ha va'inga 'i he lotu fale 'a Souí. Na'e tautau 'i he hólísí ha fakatātá ne pehē, “Ko e Ngaahi Fāmili 'Oku Ta'engata.” Na'e sai'ia 'a Mia 'i he ongo ko iá.

Na'e fakamatala'i 'e Souí, “Oku 'uhinga ia 'oku mou kei hoko ko ha fāmili 'o a'u pē ki ho'omou maté.” Na'á ne tuku hifo leva ha la'i pele pea 'unuaki'i 'ene fo'i paté.

Siosio takai 'a Mia he lokí. Na'e 'asi angama-heni pē. Na'e 'i ai ha 'ū sea sofa, tēpile, pilo, pea mo ha televīone. Ka na'e ongo kehe 'a e fale 'a Souí ia mei hono falé. “Oku 'i ai hao fāmili ta'engata?” Ko e 'eke ange ia 'e Miá.

Na'e hanga hake leva 'a Souí mei he va'inga pea malimali. “To! Na'e mali 'eku mamí mo 'eku tetí 'i he tempalé. Koe'uhí ke mau lava 'o fakataha 'o ta'engata.”

“Ko e 'uhinga nai ia 'oku ongo kehe ai ho falé?” Ko e 'eke ange ia 'e Miá.

Na'e mata puputu'u 'a Souí. “Kehe?”

Na'e 'ikai ke lava 'e Mia 'o fakamatala'i e ongo 'i he fale 'a Souí. Na'e fakafiefia mo fakamāfana. Ka na'e ongo ngalivale ke lea 'aki. Na'á ne pehē, “Oua te ke tokanga koe ki ai.” “Ta hoko atu 'eta va'ingá”

Na'e 'ikai lava 'e Mia ke ta'ofi 'ene fakakaukau ki he fāmili ta'engata 'a Souí 'i he pō ko iá. Na'á ne sai'ia he ongo 'i he fale 'o Souí. 'E hiki atu e fāmili 'o Miá ki 'Oniteliō, 'i Kānata, 'i ha 'aho sí'i mei ai. Na'á ne fifili pe 'e ongo fēfē honau fale fo'ou.

Na'e pehē 'e Mia 'i hono fakamohe ia 'e Mamí, “E Mami, 'oku ongo fiefia mo'oni e fale 'a Souí.” “Oku ou lotu ke ongo pehē mo hotau fale fo'ou. Ne fakakaukau 'a Mia ki he lahi 'o 'ene 'ofa kia Mami, Teti, mo hono ngaahi tuonga'ane ikí. “Oku ou fie ma'u ke ta'engata mo hotau fāmili foki.”

Ne fanongo fakalongolongo pē 'a Mami. Peá ne toki pehē atu, “Mo au pē.”

'I he 'aho pē hono hokó, ne tā 'a Mami ki he fa'e 'a Souí. Na'á ne 'ilo'i na'e 'alu 'a e fāmili 'o Souí ki he Siasi

'o Sīsū Kalaisi 'o e Kau Mā'oni'oni 'i he Ngaahi 'Aho Kimui Ní.

Na'e fakahā ange 'e Mia ki he'ene ongomātu'á he lolotonga 'enau fakamā'opo'opó, “Oku ou fie 'alu au ki he lotu ko iá.” Kuo meimei 'osi kotoa 'eni e fetukutuku honau falé.

Na'e pehē ange 'e Teti lolotonga 'ene tepi'i ha puhá, “Talamai 'e he mami 'a Souí te ne lava 'o tokoni'i kitautolu ke ma'u ha 'api siasi.”

Ne malimali pē 'a Mia mo ongo'i lotu māfana. Mahalo pē 'e lava honau fale fo'ou 'o ongo fakamāfana mo fakafiefia 'o hangē ko e fale 'a Souí!

'I he 'osi pē hiki 'a e fāmili 'o Miá ki honau fale fo'ou, ne nau kamata ō leva ki he lotú. Na'e angalelei 'aupito 'a e kakai 'i ai. Na'a nau feu'aki kinautolu kotoa ko e “Toku-ua” mo “Tuofefine.” Na'e 'alu 'a Mia mo hono ngaahi tuonga'ane ikí ki he Palaimelí. Na'á ne sai'ia mo'oni 'i he hiva'i e ngaahi hiva mo e lau e folofolá.

Ne taimi nounou pē mei ai kuo ha'u ha ongo finemui ki he 'api 'o Miá. Ko hona hingoá ko Sisitā Sasitini mo Sisitā Lamosi, pea ko e ongo faifekau kinaua.

Na'á na fakahā ki he fāmili 'o Miá fekau'aki mo e Tamai Hēvaní, Sīsū pea mo e Tohi 'a Molo-moná. Na'e sai'ia 'aupito 'a Mia 'i he fanongo ki he ongoongolelei. Ne a'u pē ki hono ngaahi tuonga'ane 'enau tangutu fakalongolongo pē 'o fakafanongó!

Na'e fakamatala 'e Mia kia Sisitā Lamosi mo Sisitā Sasitini fekau'aki mo e fale 'a Souí. “Oku ou fie ma'u ha fāmili ta'engata 'o hangē ko Souí.”

Ne malimali 'a Sisitā Lamosi mo ne pehē ange, “Oku finangalo 'a e Tamai Hēvaní ke tau ma'u kotoa ha ngaahi fāmili 'oku ta'engata.” “Okú Ne finangalo ke tau fiefia.”


Taimi nounou mei ai kuo fili 'a e fāmili 'o Miá ke nau papitaiso.

Na'e ō me'alele mai e fāmili 'a Souí ki 'Oniteliō ki he papitaisó. Hili ha ta'u 'e taha mei ai, ne nau toe foki mai. Na'e tu'unga ia he taimí ni he na'e silá 'i a Mia mo hono fāmili 'i he tempalé!

'I he 'aho 'o e silá, na'e tu'u 'a Mia mo hono fāmili 'i he tempalé, kuo nau 'osi teunga hinehina. Ne nau malimali lahi kotoa. Na'e ongo'i lotu māfana mo lotu nonga 'a Mia. Na'á ne pehē 'i he lotu fiefia, “Oku tau hoko he taimí ni ko ha fāmili ta'engata!”

Ne pehē ange 'e Teti, “Oku tonu ia.” “Ko ha fāmili ta'engata kitautolu.” ■

'Oku nofo 'a e tokotaha na'á ne fa'ú 'i Kololato, USA.



TĀ FAKATĀAI E BRYAN BEACH